

## Jì inant con ambizion y liam

*L'UGLD – Union Generela di Ladins dla Dolomites à fat fora l program cultural per l ann 2021. Con speranza che al posse vegnì cherié endò la »coejion soziala interladina«*



*Tratant la reunion digitala dla UGLD: la presidenta Milva Mussner con les raprezentantes y i raprezentanc dles Unions di Ladins de dutes les valedes, l diretor de La Usc di Ladins y l'aministradoura Marion Kostner.*

I Ladins é stés en chest ann benedebot despartis per les restrizions anti Covid-19. Feter dutes les manifestazions vedudes dantfora per l ann 2020 à messù vegnì desdites, y ence les miscions foradecà a manifestazions y conferenzes dles mandranzes de Europa n'è nia vegnudes a s'l di (sciche p.ej. l'Europeada tla Ciarenzia y dutes les conferenzes dla FUEN con prejenza di raprezentanc). Demé la conferenza de fauré a Roma, indirizada da la senatoura Elena Testor per mané do con la ratificazion dla Cherta europeica dles mendranzes, à podù vegnì tegnuda con na resonanza importante tla stampa nazionala, y ence l Pelegrinaje Ladin a Oies de setember é vegnù desfiré.

Gran pert dles manifestazions culturales interladines dla UGLD vegn sourantoutes danuef tl Ann 2021 y ajontedes con iniziative nueves, ensi la festa per i 100 agn dla bandiera ladina con l'auzeda de plu bandieres te posé simbolicas per la unité ladina y – baldi – la spartizion ladina, l festival di mutons »Cianta con nos« te Fodom, l Di Cultural Ladin per la conferenza internazionala di popui senza Stat (en colaborazion con i Grijons), la partezipazion a la Europeada tla Ciarenzia de jugn, la conferenza generala dla FUEN a Gurize/ Gorizia de setember, l Pelegrinaje Ladin a Oies, la partezipazion a la festa de comemorazion de Silvius Magnago a Bulsan y l contribut atif

al Ladinia – Day a Bornech. Ence a na publicazion nueva vegnel pensé: »Una Ladinia possibile« de Roland Verra, metuda adum per l centené dla Bandiera Ladina.

En chesta seira él ence vegnù aproé la verjion atualiseda dl Statut dla UGLD, aldò dla normativa dl Stat per l terz setour. I priesc per i inserac da paié te La Usc di Ladins resta unfat per dé n segnal de sostegn a privac y dites te chisc temps stentousc. Na novité él vegnù tout te chesta senteda di 4 de dezember 2020 ence per l organich dla UGLD da Nanuef 2021 inant: l colaboradour dependent y publizist Bruno Maruca vegnirà impegné tla redazion de Gherdeina a temp plen. RR